

REPÚBLIKA DEMOKRÁTIKA TIMOR-LESTE
IV GOVERNU KONSTITUSIONAL
SEKRETARIA ESTADU KONSELLU MINISTRUS

KOMUNIKADU BA IMPRENZA

SORUMUTUK EXTRAORDINÁRIA KONSELLU MINISTRUS LORON 24 FULAN NOVEMBRU 2008

Konsellu Ministrus hala'o tiha sorumutuk iha Segunda-feira semana ida ne'e, 24 fulan Novembru 2008, iha Sala Sorumutuk Konsellu Ministrus, iha Palásiu Governu, iha Díli, ne'ebé mak aprova tiha:

1. Proposta Lei kona-ba Orsamentu Jeral Estadu ba 2009

Iha sorumutuk ohin nian, Konsellu Ministrus aprova tiha ona Proposta Lei kona-ba Orsamentu Jeral Estadu nian ba Tinan Fiskal 2009, ne'ebé oras ne'e sei submete atu hetan konsiderasaun no aprovasaun iha Parlamentu Nasional.

Orsamentu ne'ebé mak elaboradu hosi Governu atu hodi, hosi parte ida, aselera prosesu rekonstrusaun nasau nian iha nível sosial no infraestrutura iha 2009, no hosi parte seluk, atu bele halo dezenvolvimentu ba ekonomia, kriasaun empregu no hamenus kiak.

OGE/AF/2009 hatama hotu reseita no despesa Estadu Timor-Leste nian. Osan hotu ne'ebé kalkula tama ba reseita OGE hosi Janeiru to'o Dezembru 2009 mai hosi fontes hotu-hotu – petrolífera, la'os petrolífera, verba hosi parseiru dezenvolvimentu no reseita seluk ne'ebé la'os fiskal nian – sura hamutuk tokon 1.344,1 dólar norte-americano.

Total dotasaun orsamental ba órgaun Estadu hotu mak tokon 680,873 dólar norte-americano, ne'ebé koresponde, ba total ne'ebé mak kalkula ona ba despesa nian. Ida ne'e katak, reseita ne'ebé la'os petrolífera nian kalkula ba tokon 91,045 dólar norte-americano, nune'e défise fiscal mak tokon 589,828 dólar norte-americano, ne'ebé mak sei taka ho verba mai hosi Fundu Petrolíferu.

Tuir Lei Fundu Petrolíferu nian, Rendimentu Sustentável hosi Fundu Petrolíferu ne'e mak porsentu tolu (3%) hosi rikusoi minarai iha tinan tinan. Ba orsamentu hosi loron 1 fulan Janeiru to'o 31 Dezembru 2009, Rendimentu Sustentável mak kalkula ba tokon 407,8 dólar norte-americano, maibé Governu sei presiza foti montante ida hosi Fundu Petrolíferu ne'ebé mak bo'ot liu Rendimentu Sustentável ho tokon 181,2 dólar norte-americano.

Dotasaun orsamental ba órgaun Estadu ida-ida hetan sistematizasaun tuir forma ne'e:

- Tokon 93,123 dólar norte-americano ba Saláriu no Vensimentu;
- Tokon 248,548 dólar norte-americano ba Bens no Servisu;
- Tokon 38,053 dólar norte-americano ba Kapital Menor;
- Tokon 205,334 dólar norte-americano ba Kapital Dezenvolvimentu;
- Tokon 95,815 dólar norte-americano ba Pagamentu Transferénsia Públika nian.

OGE ba Tinan Fiskal 2008 sei garante nia kontinuidade traballu ne'ebé mak mak hahú tiha ona hosi IV Governu Konstitusional. Bele haree katak, iha 2008 iniciativa Governu nian relasiona ho “Tinan Reforma” mak bazeia ba komponente fundamental hat :

- Atu bele hala'o Administrasaun Públika ida ne'ebé livre hosi interferénsia política;
- Estabelese prosesu no mekanismu atu hodi kombate korupsaun;
- Hadia remunerasaun no jestaun ba rendimentu funzionáriu públiku sira nian;
- Halo reforma ba sistema orsamental no finanseiru Governu nian.

Kontinuasaun ba reforma hirak ne'e iha 2009 sei sai nu'udar komponente ida ba OGE nian. Governu konsidera katak reforma kontínuia iha sektor públiku ne'e importante tebes atu hodi hetan susesu no atu habúras ekonomia país nian.

2. Dekreto-Lei ne'ebé aprova Orgánika Ministériu Finansas nian.

Diploma ida ne'e, Konsellu Ministrus aprova tiha ona iha ninia sorumutuk ohin nian, estabelese estrutura orgánika ba Ministériu Finansas no kompeténsia no atribuisaun ba da-idak nia servisu.